

ЛИТЕРАТУРА

Курадзонэз воштйз мытылон?

Ашальчи Окилэн мытэм сюресэз вуттйз тюр шорозь

Анастасия ШУМИЛОВА

1918-тй арын 10-тй юж-толэзе «Виль синь» газетын печатламын вал Ашальчи Окилэн «Аракы улонэз быдтэ» кылбурез. Ма воштйськиз удмурт нылкышно литератураын 100 ар чоже? Таце юанэн вазиськиз Любовь Фёдорова тодосчи «Сюрес дурысь тюр шорозь: нылкышно литература сярись малпанъёс» котырес жёке люкасъем калыклы.

Газет бамъёс бордысен

Куарусэнэ 60 арес тырмиз удмурт нылкышно литератураез мылысь-кыдысь эскерислы Любовь Фёдорова. Соин Национальной библиотекаен радъям ужрадын огдыре жечкыланъёс но чузъяськызы, висытйсь ужпумъёс но сарттйськызы-пертчйськызы.

Нырысь ачиз Любовь Петровна вераськиз удмурт нылкышно литературалэн жужамез сярись. Тодосчи али архивъёсын трос ужа, эскере 20-тй даурлэн кутсконаз удмурт кылын печатлам газетъёсты. Озы со паймыса тодэм, 1917-тй-1918-тй аръёсы нылкышно гожъяськысьёс трос гинэ выльллям шуыса - ог 30 ним шедьтыны луоно. Тросэз асьсэлэсь нимзэс оз шараяллялэ, кушем нимъёс кутылллям: Удмурт ныл, Удмурт дышетйсь ныл, Уно курадзем ныл, Зор, Докъя ныл, Одотъ но мукет. Тросэз, озыен, удмурт луэмзэс пусыльллям. Пёлазы, пе, фамилиен гожъяськысыз но шедьло: Ольга Андреева, Татьяна Захарова, Ильина, Майорова, Мария Баженова но мукетъёсыз. Гожъяськиллям тросгес публицистика жанрен, политика юанъёсты но валаса усътыльллям. Калыклы валэктны тыршиллям, кызы астэ висёнъёслэсь утёно.

Тужгес трос гожъяськем Удмурт ныл - солэн публицистика жанрен ужъёсыз но, кылбуръёсыз но выльллям, удмурт кылэ Иван Крыловлэсь басняосэ берыктылэм. Али дыре тодосчиос ог малпанэ вуэмын өвёл, кин со кушем нимын печатласъем: Фома Ермаков но Анатолий Уваров малпамъя, пе, со Васса Чиркова - Кузубай Гердлэн Глазов ёросысь чош ужам эшез, но та малпан документъёсын юнматэмын өвёл на. Любовь Петровна, солэсь



udmkrai.unatlib.ru

ужъёсэ эскерыса, малпанэ вуэм, куд-ог учыръёсы Удмурт ныл гожъяськыны быгатэмын Ашальчи Окиен артэ мынэ вылэм шуыса.

Любовь Петровна пусйиз: 1918-тй-1919-тй аръёсы материалъёсты учконо ке, Ашальчи Окилэн нимыз висъяське ини. Нырысь кылбуръёсаз социальной пуштрос юнгес шодйське, собере лирической кылбуръёсыз синйылымон луо.

- Лирической кылбуръёсаз Ашальчи Оки, калык кыло вылэ пыкыськыса, аслэстыз пуш дуннезэ усътэ. Ашальчи Оки лирической традициосты литературае пычатйз, оло, соин но удмурт литератураын кужмогес луэ лирика - чапак со пыр кышномуртъёс паймымон быгатаса усъто дуннезэ шодэмзэс но вакытлэсь ужпумъёсэ. Ашальчи Оки зол веросчи но луэ. Али веросъёсэ эскериськом-пертчйськом. Солэн отын туж тунсыко юморез, - вера Любовь Петровна.

Жалыса верано, Ашальчи Оки репрессииос улэ шедиз, мукетэс гожъяськисез - Мария Баженоваез - но печатламысь дугдйзы. Газетъёсын вань печатласъем удмурт нылкышноос кутскон сётйзы удмурт нылкышно гожъяськонлы. Кызы шуэ Любовь Петровна, кёня ке вис луэм бере, 1960-тй аръёсы, гожъяськыны кутскизы Алевтина Аникина, Степанида Иванова, Лидия Чернова, Юлия Байсарова, Анна Колесникова но мукетъёсыз. Та нимъёсты тырмыт ум тодйське на, ужъёсы калыклы жеч-жеч тодмо өвёл, но со дыре ик тросэз та вакытэ гожъям кылбуръёс кырзанъёслы пюрмемын. Нылкышно гожъяськон усътыськиз-пушйиз 1980-тй аръёсы. Та вакытысь нимъёсты - Алла Кузнецоваез, Людмила Кутяноваез, Га-

Л. Фёдорова вера аслаз книгаосыз сярись.

лина Романоваез, Татьяна Черноваез - жеч тодйськом, со классика ини. Та вакытысь ик традиция сярись, ог-огедлэсь дышетскон но адзем карон сярись вераськыны луоно. Соос бёрсы литературае пыризы Лидия Нянькина, Люза Бадретдинова, Зинаида Рябинина, Елена Миннигараева.

Чидано яке пумитъяськоно?

Вера Пантелеева тодосчи малпамъя, литератураез эскерыку, тодоно, кызы воштйськиз гожъяськысьлэн но лирической героинялэн ас шодонзы. Со пусъемъя, 1980-тй аръёсы тодмо луэм кылбурчиос вайышты Ашальчи Окилэн мытэм сюрестйз. Соослэн ас шодонзы вашкала кышномуртъёслэн кадъ кылемын, со понна ик асьмелы соос дуно. Тып-тып удмурт нылкышно, кудзэ асьмеос фольклорысь тодйськом, интеллигентной луэмын, ассэ йёно воземын висъяське - калыкын ассэ чакла, кепыра, со нокинлы уг вожъяськы, нокинлэсь номыр уг возьма, номыр мултэсэз со сямын өвёл, шуэ Вера Григорьевна. Нош 21-тй даурын улонлэн синучконэз луиз Интернет.

- Огласянь, кин али ассэ вотэсын уг возьматы, уг ушъя, уг потты - со бере кылем адыми. Удмурт калык понна али валамон өвёл, кулэ-а отчы пырыськыны яке өвёл. Ум-а ыштйське асьмемыз отын? Нимысьтыз гожъяськысьлы со, оло, умой, нош огъя удмуртлыкез утёнын, оло, маиз ке ыше. Удмурт адыми потыны кулэ кадъ ком пушкысьтыз но ассэ усътыны кулэ, - малпаськон ёрзэ усътыз Вера Пантелеева.

Любовь Фёдорова, литератураын воштйськонъёс

сярысь вераськонэз азыланьтыса, ватсаз, азыло нылкышно кылбуретын чидан мотив зол шодйське вал шуыса, нош али со ыше, берло дыре нылкышно лирикаын азывыл традициослы мытылон шодйське. Тодосчи верамъя, удмурт поэзиын но со вань: Серафима Пушина-Благинина лэн творчествояз өвёлзэ но вань карыса паймытыны тыршон шом пычамын, Зинаида Рябинина лэн - азыло дышем стереотипъёслы пумитъяськон. Алевтина Аникина лэн «Чагыр инмын пишто кизилюос...» чуръёсызлы пумитъяськыса, со гожтэ: «Чагыр инмын кизилюос уг пишто». Азыло нылкышно кылбурчиослэн ужъёсазы лирической героиня пиосмуртэз утча вал, мед со пыкъет луоз шуыса, нош берло соос ини улонзэс асьсэ киязы басьто.

Литератураез эскерись Виктор Шибанов малпамъя, берло дыре удмурт прозае постмодернизмен чош пыриз шузяськон ёр - Лидия Нянькина лэн «Ау-ау! яке Инбамысь гожъёс» повестяз со шодйське. Дарали Лелилэн но Мария Векшина лэн но ужъёсазы эпатаж сётыны тыршон шодскымон. Со дыре ик, пусъе тодосчи, азинске конфликтэм литература.

Люкон уг люкеты

Огез валтйсье юан, кудзэ сарттйзы-пертчйзы котырес жёкын - вань-а нимысьтыз нылкышно литература, кулэ-а люкыны воргорон но нылкышно гожъяськонэз? Елена Миннигараева журналист, писатель верамъя, вань нимаз нылкышно шодонъёс, нош нылкышно но воргорон литератураосты люкон кёня ке искусственной луэ: чёмысь, пе, туалэ произведенийез лыдзьку, пюртэмлыкез уг шодйськи, гожтйз-а сое кышномурт

яке пиосмурт. Со пусйиз: берло дыре литератураын но журналистикаын кышно-муртъёс шапльгес луизы.

Та пумысен кенешыса, огъя малпан кылдйз, со оглом улонлэн воштйськеменыз герзаськемын шуыса - совето вакытэ литература, журналистика воргоронэз сюдо вал, нош али творчествоен вырыса коньдон уд потты. Озыен, литература хобби-лы пюрмиз, ваньмыз дась өвёл, ваньмон дырзэс солы сйзыса, гожъяськыны. Вера Пантелеева ватсаз, наукаын но пиосмуртъёслэн лыдзы синйз шуыса. Елена Миннигараева малпамъя, вотэс но кылдытэ луонлык астэ возьматыны. Со дыре ик, пусйиз гожъяськись, туалэ вакытэ тросэз асьсэды вотэс бамъёс пыр тодмогес карыны выро, нош литературае номыре уг пырто - лыдйысь кие текст уг вуы. Со но вакытлэн тодметэз, оло, азыланаз калык выльысен книга борды кыстыськоз.

Книга поттон пумысен гинэ сюлмаськоно өвёл, соосты дунъян ужпум но висытйсь луэ. Критикалэн тырмымтэез сярись вераськыкуз, Вера Пантелеева пусйиз: али нокин но дась өвёл секыт ныпъетэз - критиклэсь ужзэ - вылаз басьтыны. Гожъясьёс жеч кыльёсты возьмало уго, нош чурьыт но ме́кыт вераны али нокинлэн мылыз уг поты. Со дыре ик, Вера Пантелеева малпамъя, дыр возьматоз, кин кылэз литературае, нош кинлы улонлэн шураз выйыны кылдоз.

Йылпумъянъёс лэстыиз Любовь Фёдорова: воргорон но кышномурт литератураосты люкон, соосты чоштончик но уг люкеты - кужмо ке луиз нылкышно литература, оглом гожъяськон удис зол луоз, вылаз ик, вожвыль-яськон котыку литератураез азинтыны юрттэ. ***

МАЛПАН



Любовь Фёдорова:

- Азыло нылкышно кылбурчиослэн ужъёсазы лирической героиня пиосмуртэз утча вал, мед со пыкъет луоз шуыса, нош берло соос ини улонзэс асьсэ киязы басьто.



Вера Пантелеева:

- Огласянь, кин али ассэ вотэсын уг возьматы, уг ушъя, уг потты - со бере кылем адыми. Удмурт калык понна, интеллигенция понна али валамон өвёл, кулэ-а отчы пырыськыны яке өвёл. Ум-а ыштйське асьмемыз отын?